

05. august 2013

Inatsisartut suleriaasianni § 37 naapertorlugu matumuuna imatut apeqquteqaateqassaanga:

Andreas Uldumip Demokraatinersup 2012-imi Inatsisartut aalajangiiffigisassaattut siunnersuutigaa, Naalakkersuisut Nunatta piniakkat neqaannik avammut nioqquteqarnerata siuarsaavigineqarnissaa pillugu 2013-ip ingerlanerani misissuinissaannik peqquneqassasut. Aalisarnermut, Piniarnermut Nunalerinermullu ataatsimiititaliap isumaqatigiissup inassuteqaateqarneratigut siunnersuut akuerineqarpoq. Suliaq aallartinneqareerpa, aamma misissuineq qaqugu Inatsisartunut saqqummiussinnaassallugu Naalakkersuisut naatsorsuutigaa?

(Inatsisartunut ilaasortaq Jens B. Frederiksen, Demokraatit)

Tunngavilersuut:

Andreas Uldumip Demokraatinersup 2012-imi Inatsisartut aalajangiiffigisassaattut siunnersuutigaa, Naalakkersuisut Nunatta piniakkat neqaannik avammut nioqquteqarnerata siuarsaavigineqarnissaa pillugu 2013-ip ingerlanerani misissuinissaannik peqquneqassasut. Aalisarnermut, Piniarnermut Nunalerinermullu ataatsimiititaliap isumaqatigiissup inassuteqaateqarneratigut siunnersuut akuerineqarpoq.

Tamanna tunngavigalugu paaserusuppara, suliaq aallartinneqareersimanersoq, aammalu misissuineq qaqugu Inatsisartunut saqqummiussinnaanissaa Naalakkersuisut naatsorsuutiginaat.

Inuussutissat avatangiisinut tunngatillugu eqqortumik uumasunillu piujuaannartitsinissamik tunngaveqartumik tunisassiarineqarsimanissaat, nunarsuaq tamakkerlugu atuisartut eqqumaffigineruleriartuinnaat. Immap nillertup raajaanik tunisassiatta nunani tamalaani ataqqisaasumik MSC-mik akuersissuteqalernerisa qanoq aningaasatigut pilerisaaruteqarnikkullu iluaqutissaqartaqartiginera maannakkut takusinnaalereerparput.

Avatangiisinut tunngatillugu eqqortumik uumasunillu piujuaannartitsinissaq tunngavigalugu inuussutissanik tunisassiornerup immikkut isiginiarneqarnera Nunatta aamma iluaqutissarsiffigisinnaavaa. Piniakkatta pinngortitami uumasuusut neqaat akuutissalersugaanngillat, piniakkat pinngortitami pitsaasumik kiffaanngissuseqartumillu uumasuupput piniakkallu amerlassusaat piujuaannartitsinissamik tunngaveqartumik nakkutigineqarlutik.

Taamaakkaluortoq inuussutissanik avammut nioqquteqarnitta tamangajaa aalisarnermeersuuvoq. Raajat, qalerallit aalisarnermilu tunisassiat allat nunarsuarmi niuerfimmi akigitinneqartunut siunissami pituttorsimajunnaarniassagutta, taava tunisassianik allanik avammut nioqquteqarnerput annertusartariaqarparput. Piniakkat neqaannik avammut nioqquteqarsinnaanermut periarfissanik tamatumunngalu killilersuutaasinnaasunik misissuinissaq tamatuma anguniarnissaanut alloriarnerussaaq pitsaasoq. Tamannalumi pissutigalugu Andreas Uldumip siunnersuutaata akuerineqarnera Demokraatinit nuannaarutigaa, aammalu misissuinerup tigunissaa qilanaaralutigu.

Apeqqutip ullut suliffiut qulit iluanni akineqarnissaa kissaatigaara.